



PATNUBAY SA MISA



15 Oktubre 2017

Ika-28 Linggo sa Karaniwang Panahon

Taon A

Maligaya ang mga Inaanyayahan sa Piging ng Kaharian

Bawat pagdiriwang ng Eukaristiya ay di lamang muling pagsasadula ng Huling Hapunan ng Panginoon, kundi paunang tikim din ng piging ng Kaharian. Ang paanyaya sa dalawang piging na ito ay una sa lahat isang tanda ng dakilang pag-ibig ng Panginoon para sa atin. Ito rin ay higit na di-hamak sa maaaring maging karapat-dapat sa mga pinakadakilang santo. Ngunit inaanyayahan tayo rito, salamat sa kabaitan ng Diyos.



Sa ganang atin, marapat namang ipakita ang ating pagpapahalaga sa pagkabukas-palad ng Panginoon sa pamamagitan ng pagdalo sa piging ng Eukaristiya nang may angkop na “gayak pangkasalan.” Ibig sabihin nito ay isang pusong lubos na malinis sa ano mang kasalanan at napa-lalamutihan ng lahat ng kabaitan ng isang disipulo ni Kristo.

Sa pagsisimula natin sa Eukaristiyang ito, pagtibayin nating muli ang pangako nating mamuhay sa harap ng Panginoon at ialay sa kanya ang pagpupugay ng isang pusong tapat.

PASIMULA



Pambungad

(Ipahahayag lamang kung walang awiting nakahanda.)

Kapag iyong tinandaan lahat ng aming pagsuway, kami kaya ay tatagal? Kaya't ika'y mapagbigay at maawaing Maykapal.

Pagbati

P– Pagpalain ang Panginoong ating Diyos na nag-aanyaya sa atin sa piging ng buhay na walang hanggan. Ang Kanyang biyaya at kapayapaan ay sumainyong lahat!
B– At sumaiyo rin!

Pagsisisi

P– Tuwing tayo'y nagdiriwang ng Eukaristiya, tumutugon tayo sa paanyaya ng Diyos sa “Piging ng Kaharian.” Tumigil tayo saglit at tanungin natin ang ating sarili kung ang gayak ba nating espirituwal ay alinsunod sa kabanalan

ng ating pag-aalay. (Manahimik saglit.)

P– Para sa pagpapabaya naming pahalagahan ang aming pan-Linggong pagsamba ng pamanayan, Panginoon, kaawaan mo kami!

B– Panginoon, kaawaan mo kami!

P– Para sa higit naming pagpapahalaga sa ibang mga gawain kaysa sa pan-Linggong Banal na Misa, Kristo, kaawaan mo kami!

B– Kristo, kaawaan mo kami!

P– Para sa aming pangungumunyon nang wala sa angkop na disposisyon, Panginoon, kaawaan mo kami!

B– Panginoon, kaawaan mo kami!

P– Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B– Amen!

Papuri

B– Papuri sa Diyos sa kaitaasan at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P—Ama naming makapangyarihan, ang iyo nawang kagandahang-loob ay manguna at sumubaybay sa aming pamumuhay ngayon at araw-araw upang kami'y itaguyod sa paninindigang gumawa ng kabutihan sa pamamagitan ni Hesukristo kasama ng Espiritu Santo magpasawalang hanggan.

B—Amen!

PAGPAPAHAYAG NG SALITA NG DIYOS



Unang Pagbasa *Isa 25:6-10*

Sa maraming siglo, nanalig ang mga Israelitang sila lamang ang laging mahal ng Diyos. Ngunit iba ang plano ng Diyos. Sa pamamagitan ng propetang si Isaias, ipinahayag Niyang balang araw, lahat ng tao sa buong daigdig ay dudulog sa piging ng Kanyang kaharian.

L—Pagpapahayag mula sa Aklat ni Propeta Isaias

Sa Bundok ng Sion, aanyayahan ng Panginoon ang lahat ng bansa. Gagawa siya ng isang piging para sa lahat na ang handa'y masasarap na pagkain at inumin. Sa bundok ding ito'y papawiin niya ang kalungkutang naghahari sa lahat ng bansa. Lubusan na niyang papawiin ang kamatayan. Papahirin ng Panginoon ang luha ng lahat; aalisin niya sa kahihyan ang kanyang bayan.

Kung magkagayon, sasabihin ng lahat: "Siya ang ating Diyos na ating pinagtitiwalaan, ang inaasahan nating magliligtas sa atin. Magalak tayo at ipagdiwang ang kanyang pagliligtas." Iingatan ng Diyos ang bundok na ito.

Ang Salita ng Diyos!

B—Salamat sa Diyos!

Salmong Tugunan *Awit 22*

B—Lagi akong mananahan sa bahay ng Poong mahal!

R. M. Velez



La-gi a-kong mana- na-han sa



ba-hay ng Po-ong Ma- hall

* Panginoo'y aking Pastol, hindi ako magkukulang. Ako'y pinahihimlay sa mainam na pastulan, at inakay niya ako sa tahimik na batisan, binibigyan niya ako niyong bagong kalakasan. *B*.

* At sang-ayon sa pangako na kaniyang binitiwang sa matuwid na landasi'y doon ako inaakay. Kahit na ang daang iyo'y tumatahak sa karimlan, hindi ako matatakot pagka't ika'y kaagapay; ang tungkod mo at pamalo ang gabay ko at sanggalang. *B*.

* Sa harapan ng lingkod mo, ikaw ay may handang dulang, ito'y iyong ginagawang nakikita ng kaaway; nalulugod ka sa akin na ulo ko ay langisan at pati na ang kalis ko ay iyong pinaapaw. *B*.

* Tunay na ang pag-ibig mo at ang iyong kabutihan, sasaaki't tataglayin habang ako'y nabubuhay; doon ako sa templo mo lalagi at mananahan. *B*.

Ikalawang Pagbasa *Fil 4:12-14.19-20*

Sa pagwawakas ng kanyang liham sa mga Kristiyano ng Filipos, binibigyang-diin ni San Pablo ang kanyang pagtatakwil sa mga ari-ariang materiyal. Pinasasalamat din niya ang kanilang bukas-palad na tulong pampananalapi. Ang ganitong mga kabaitan ay marapat din nating tularan ngayon.

L—Pagpapahayag mula sa Sulat ni Apostol San Pablo sa mga taga-Filipos

Mga kapatid: Naranasan ko ang maghikahos. Naranasan ko rin ang managana. Natutuhan ko nang harapin ang anumang katayuan: ang mabusog o magutom, ang kasaganaan o kasalatan. Ang lahat ng ito'y magagawa ko dahil sa lakas na kaloob sa akin ni Kristo.

Gayunman, ikinagagalak ko ang ginawa ninyong pagtulog sa akin.

At buhat sa kayamanan ng Diyos na hindi mauubos, ibibigay niya ang lahat ng inyong kailangan sa pamamagitan ni Kristo Hesus.

Purihin ang ating Diyos at Ama magpakailanman! Amen.

Ang Salita ng Diyos!

B—Salamat sa Diyos!

Aleluya

Ef 1:17-18

B—Aleluya! Aleluya!

D'yos Ama ni Hesukristo,

kami ay liwanagan mo at tutugon kami sa'yo.

Aleluya! Aleluya!

Mabuting Balita *Mt 22:1-14*

Sa parabula ngayong tungkol sa piging pangkasalan, ginaganyak ni Hesus ang mga pinunong Judio na magnilay sa mahahalagang ibubunga ng pagtanggap sa paanyaya ng Diyos na sila'y maging bahagi ng Kaharian. Pinaaalalahanan din niya ang mga nagpaunlak sa paanyayang sila'y dapat tumugon sa moral na pananagutan sa kanilang katayuan.

P—Ang Mabuting Balita ng Panginoon ayon kay San Mateo
B—Papuri sa iyo, Panginoon!

Noong panahong iyon, muling nagsalita si Hesus sa mga punong saserdote at matatanda ng bayan sa pamamagitan ng talinghaga. Sinabi niya: "Ang paghahari ng Diyos ay katulad nito: naghandog ng isang piging ang isang hari sa kasal ng kanyang anak na lalaki. Sinugo niya ang kanyang mga alipin upang tawagin ang mga inanyayahan ngunit ayaw nilang dumalo. Muli siyang nagsugo ng ibang mga alipin at kanyang pinagbilinan, 'Sabihin ninyo sa mga inanyayahan na naihanda ko na ang aking piging: napatay na ang aking mga baka at mga pinatabang guya, at handa na ang lahat ng bagay. Halina kayo sa piging!' Ngunit hindi ito pinansin ng mga inanyayahan. Humayo sila sa kani-kanilang lakad; ang isa'y sa kanyang bukid at sa kanyang pangangalakal naman ang isa. Sinunggaban naman ng iba ang mga alipin, hinamak at pinatay.

Galit na galit ang hari. Pinaparoon niya ang kanyang mga kawal, ipinapuksa ang mga mamamatay-taong iyon at ipinasunog ang kanilang lunsod. Sinabi niya sa kanyang mga alipin, 'Nakahanda na ang piging, ngunit hindi karapat-dapat ang mga inanyayahan. Kaya't pumunta kayo sa mga lansangang matao, at inyong anyayahan sa kasalan ang lahat ng makita ninyo.' Lumabas nga sa mga pangunahing lansangan ang mga alipin at isinama ang lahat ng natagpuan, masama't mabuti, anupa't napuno ng mga panauhin ang bulwagang pangkasalan.

Pumasok ang hari upang tingnan ang mga panauhin, at nakita niya roon ang isang taong hindi nakademit-pangkasalan. 'Kaibigan, bakit ka pumasok dito nang hindi nakademit-pangkasalan?' tanong niya. Hindi

nakaimik ang tao. Kaya't sinabi ng hari sa mga katulong, 'Gapusin ninyo ang kanyang kamay at paa at itapon siya sa kadiliman sa labas. Doo'y mananangis siya at magngangalit ang kanyang ngipin.' Sapagkat marami ang tinatawag, ngunit kakaunti ang nahihirang."

Ang Mabuting Balita ng Panginoon!

B—Pinupuri ka namin, Panginoong Hesukristo!

Homiliya

Sumasampalataya

B—Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P—Sa pagkakatipon natin bilang mag-anak ng Diyos para sa piging ng Eukaristiya, ipanalangin natin ang mga pangangailangan ng sangkatauhan at ang sa atin. Maging tugon natin ay:

B—Panginoon, dinggin mo kami!

* Para sa Simbahan, ang pamaayanang inaanyayahang dumulog sa piging ng pag-ibig ng Diyos: Nawa ang masiglang paglahok dito'y maging isang inspirasyon sa lahat ng tao para tanggapi't pasalamatang paanyaya ng Diyos. Manalangin tayo! **B.**

* Para sa Santo Papa, ating Obispo, at lahat ng iba pang pinunong espirituwal: Nawa tulungan tayo ng kanilang halimbawa sa maagap na pagtugon sa panawagan ng Diyos. Manalangin tayo! **B.**

* Para sa lahat ng Kristiyano, lalo na para sa mga Katoliko sa ating bansa: Nawa maunawaan nila ang pangangailangan sa pamaayanang mga disipulo alinsunod sa turo ng *PCP II*. Manalangin tayo! **B.**

* Para sa lahat ng higit na naakit sa mga makamundong panghalina kaysa mga pagpapahalaga sa Ebanghelyo: Nawa maunawaan nilang ang tunay na mahalaga sa buhay ay ang pagtupad sa kalooban ng Diyos at pagsisikap sa Kanyang Kaharian. Manalangin tayo! **B.**

* Para sa ating lahat na natitipon dito para sa ating pagsamba ngayong Linggo at sa ating mga pamilya: Nawa makilahok tayong ang puso'y malinis sa ano mang kasalanan at napalalamutihan ng pananampalataya at pagkakawang-gawa. Manalangin tayo! **B.**

* Tahimik nating ipanalangin ang ating pansariling mga kahilingan. (*Tumigil saglit.*)

Manalangin tayo! **B.**

P—Panginoong Diyos, marami pong salamat sa pag-aanyaya sa amin sa Piging Pangkasalan ng Iyong Anak na si Hesus. Ipagkaloob Mo sa amin ang biyayang kami'y laging magpasalamat sa gayong pribilehiyo sa pamamagitan ng pamumuhay na kalugudlugod sa Iyo. Isinasamo namin ito sa pamamagitan ni Kristong aming Panginoon.

B—Amen!



P—Manalangin kayo . . .

B—Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P—Ama naming Lumikha, tanggapin mo ang aming mga panala-

ngin na sumasaliw sa aming paghahain upang sa ginaganap naming pagdiriwang kami'y makatawid sa kaluwalhatian sa pamamagitan ni Hesukristo kasama ng Espiritu Santo magpasawalang hanggan.

B—Amen!

Prepasyo IV

P—Ama naming makapangyarihan, tunay ngang marapat na ikaw ay aming pasalamatang sa pamamagitan ni Hesukristo na aming Panginoon.

Siya ay naging kapwa naming maaasahan upang may mangunang umako sa pananagutan dahil hangad mong magbago ang kinamihansang pagkakanya-kanya ng sangkatauhan. Bunga ng pagtituis, siya ay nanaig at ang kamatayan ay kanyang nalupig kaya't siya ang aming Daan para aming masapit ang iyong tapat at maaasahang pag-ibig.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B—Santo, santo, santo . . .

Pagbubunyi

B—Sa krus mo at pagkabuhay kami'y natubos mong tunay, Poong Hesus naming mahal, iligtas mo kaming tanan ngayon at magpakailanman.



B—Ama namin . . .

P—Hinihiling namin . . .

B—Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B—Kordero ng Diyos . . .

Paanyaya sa Pakikinabang

P—Ito si Hesus, ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B—Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang
(Ipahahayag lamang kung walang awiting nakahanda.)

Kahit mga mayayaman ay nagugutom din naman, ngunit pinapakinabang ng Panginoon ang tanang sa kanya'y naglalapitan.

Panalangin Pagkapakinabang

P—Ama naming mapagmahal, ngayong kami'y iyong pinapakinabang sa Katawa't Dugong banal iniluluhog namin sa dakila mong kabutihan sa tanan na kami'y gawin mong kasalo sa iyong buhay sa pamamagitan ni Hesukristo kasama ng Espiritu Santo magpasawalang hanggan.

B—Amen!



P—Sumainyo ang Panginoon.

B—At sumaiyo rin!

P—Magsiyuko kayo at ipanalangin ang pagpapala ng Diyos. (Tumahimik sandali.)

Iligtas nawa kayo ng Ama ng pag-ibig at awa laban sa lahat ng masama, at gabayan nawa kayo tungo sa kabanalan at kapayapaan.

B—Amen!

P—Tibayan nawa ng Kanyang Anak na si Hesus, na aming Kapatid at Tagapagligtas, ang aming mga puso sa harap ng tukso at panghihina ng loob.

B—Amen!

P—Akayin nawa kayong lagi ng Espiritu ng karunungan sa pagtanggap sa paanyaya ng Ama at sa gayo'y malasap ninyo ang kagalakan sa Kanyang Kaharian.

B—Amen!

P—Pagpalain kayo ng makapangyarihang Diyos: Ama, Anak, at Espiritu Santo.

B—Amen!

P—Humayo kayo sa kapayapaan at maging kasangkapan ng pag-ibig ng Diyos para sa lahat.

B—Salamat sa Diyos!

Fatima Hindi Lang Isang Debosyon Kundi Ating Misyon
(Ikatlong Bahagi)

• **Glady V. Ramos (Salin ni Jenrose Dy)**

(Tala ng Editor: Sa pagpapatuloy ng ating pagdiriwang ng ika-100 Taong Anibersaryo ng Pagpapakita sa Fatima, ipinagpapatuloy din natin ang tampok na artikulong nailathala sa **Word & Life, August-September issue.**)

Panahon ng Awa

Si Fr. Michael Gaitley, MIC, may-akda ng pinakamabentang librong **33 Days to Morning Glory**, ay paulit-ulit na nagtatanong sa mga dumalo sa *National Marian Congress* sa SMX Convention Center ng, “Anung oras na?”

Sabi niya, “Oras na ng Awa.” Ipinaliwanag niyang ang nararasan natin sa mga oras na ito ay ang Panahon ng Awa, na inihayag ng Panginoon kay Sta. Faustina Kowalska. Ngunit pagkatapos ng Panahon ng Awa ay ang Araw ng Paghuhukom. Kaya hinihikayat ni Fr. Gaitley ang lahat na gamitin ng maayos ang panahong ito nang sa gayon ay maging handa tayo sa pagdating ng Araw ng Paghuhukom. Binibigyang-diin din niya ang kahalagahan ng debosyon sa Banal na Awa at ang Pagtatalaga kay Maria.

33 Days to Morning Glory


Ngayon ay may ipinatu-tupad na kilusan sa Estados Unidos, Mexico at iba pang mga bansa sa Latin America na magsagawa ng Marian Consecration upang malabanan ang kasamaan sa mundo, makamtan ang kapayapaan, magdasal para sa pagbabalik-loob ng mga makasalanan at pagbabayad-sala para sa Kalinis-linisang Puso ni Maria.

Ginagamit nila ang **33 Days to Morning Glory** ni Fr. Michael Gaitley. Ang

kanyang aklat ay sapat na ihinahanda ang isang indibidwal upang lubusang maintindihan, pahalagahan, at isabuhay ang kanyang pagtatalaga kay Maria sa pagpili sa mga tala at buhay ng 4 na dalubhasa tungkol kay Maria. Ito ay sina: St. Louis de Montfort, St. Maximilian Kolbe, Sta. Teresa ng Calcutta, at St. John Paul II.

Sinulat ni Fr. Gaitley ang aklat na ito dahil, ayon kay St. Louis de Montfort, **Ang Kabuuang Pagtatalaga kay Hesus sa pamamagitan ni Maria ay ang “pinakasigurado, madali, maikli at pinaka-perpektong paraan” para maging isang santo.**

Ang **33 Days to Morning Glory** ay mabibili sa Word & Life Bookstore. Tumawag sa # (02) 894-5401/02 o mag- email sa wordandlifepublications@gmail.com para sa mga katanungan at mga order. Para sa ibang bansa, magpunta sa ShopMercy.org.



WORD & LIFE PUBLICATIONS

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org, wordandlifepublications@gmail.com • FB: Word & Life Publications

• Editorial Team: Fr. S. Putzu, C. Valmonte, G. Ramos, V. David, J. Dy, D. Daguio

• Illustrations: A. Sarmiento, B. Cleofe • Circulation: R. Saldua